



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Su schisòrgiu po chini fiat destinau

Unu tempus nci fiat un'òmini ca si fiat cojau po tres bortas, ma apustis de duus mesis de coja, ddi moriat sa pobidda e nisciunus scidiat po mori de ita. Intzandus, candu si cojat sa de cuatru, una fèmina intelligenti e coragiosa meda, ca non timiat nudda ddi sutzedid una cosa strana.

Una diri sa sposa si ndi acatat ca su sposu si ndi fiat pesau a ora de mesunoti e dd'iat lassada a sola, ma issa non timit, billat e abetat.

A s'ora de sa una bidit intrendu in domu sua cuatru òminis bistius de nieddu ca bitiant unu baullu. Ponint su baullu aintru de s'aposentu, si setzint a ingìriu e incumentzant a prangi narendu:

- Fradi miu! Fradi miu bonu!

Sa fèmina si ndi pesat e incumentzat issa puru a prangi e narat:

- Fradi miu! Fradi miu caru!

Issus si ndi pesant e incumentzant a curri in su sartu e lassant su baullu a solu. Sa fèmina abarrada a sola s'acostat, dd'oberrit e dd'agatat prenu de oru.

Custa paristòria, si contat ca fessit acadèssia a Santu Franciscu de s'Aglientu, unu furriadroxu piticu ca s'agatat me in su sartu de Vignola: a chini est destinau su schisòrgiu est postu a sa proa e apustis de custas proas podit fintzas morri.

Su monti de sa Gruxita de Àggius

Tempus meda a oi, su dimòniu si fiat postu meri de su montixeddu de sa Gruxita de Àggius e a de noti candu su tempus fiat malu meda s'intendiant custus fueddus:

Àggius meu, Àggius meu

Candu at a essi sa diri

Ca t'apa a portai

In su bentu e in su bòlidu

Intzandus po nci bogai su dimòniu sa genti at prantau in custu monti una gruxitedda e po custu motivu de intzandus su monti est tzerriau monti de sa Gruxita.